

新都縣志卷十四

藝文

重修桂湖記

楊道南

壬申夏六月余赴始康任舊例履任後閱城城齊  
整完固繞城上行見城南門內有田數十頃禾黍  
芄芄蔚然在望因思邑爲通都孔道居民比屋而  
居者鱗鱗而立幾無隙土安有原田膾膾錯出於  
人烟稠密中乎詢諸士人曰此古桂湖也廢而爲  
田將百年矣有明楊升菴先生於兩堤栽桂樹數

新都縣志

卷十四

藝文

一

百株作桂湖曲故後人呼爲桂湖乃一縣勝蹟本  
不可沒緣乾隆十四年湖水偶涸奉役在公者請  
於官將此湖湮爲田以充解費士人屢爭之官弗  
爲理事遂寢去歲大憲飭各屬修志有欲復古者  
復訴於太守太守下其議余幕友擬以分半之說  
始是而終疑之因集士人於庭而問之君等爲爭  
田乎爲復湖乎若爭田是以利言也分半之說亦  
無不可若欲復湖余請以完璧歸趙士人慨然皆  
願復湖余喟然而嘆曰事無大小不繫以私皆可

行向來官斯土者亦知曲在役直在士人費無所  
出故容隱而袒護之余一行作吏安肯明知其非  
而故文之乎俟秋收後田復爲湖費捐於官不狗  
私不累民區區之志如此他日湖成波光萬頃激  
徹淵涵縈迴映帶於閭閻間者洵一邑之巨觀也  
公暇時與邑中士大夫或游堤或泛艇飲酒賦詩  
憑弔升菴之遺蹟俯仰興懷流連不置不獨士大  
夫之樂亦可副官斯土者培地脈興人文之至意  
也

新都縣志

卷十四

藝文

二

清明祭狀元楊升菴文

楊道南

先生學冠古今才高宇宙鎔經鑄史地負海涵窺  
秘閣而挹羣言搜百家而標新議著作四百餘種  
無體不賅歷數三百餘年誰人敢伍慟哭闕廷櫻  
龍鱗而遭貶謫流離黔省值夔屈而放嘯歌簪花  
唱曲雖自晦不失風流修史箋經卽負罪依然儒  
雅忠心旣白死後猶留官階坏土猶存生前有關  
文獻仰遺徽而隕涕像獨高懸撫後裔而傷心藏  
偏零落白楊空長風景淒涼黃土遺堆故阡寂寞

清明上塚各有水源木本之思文章有神能無雲  
散風流之感道南等或司民社或本斯文各奉辦  
香咸備酒醴虔申一奠永裕千秋

改修龍門書院序

楊道南

龍門書院東街二公館其舊址也創自乾隆甲戌  
年王公垂綺泊己酉署事刺史任君琦募都人士  
捐貲徙建於斯且置買田畝以作膏火立齋長以  
董其事歷任列有章程俱刊載於碑茲不復贅但  
書院坐西向東前乃 文昌宮地形窄狹不宏廠

予蒞任課試親詣其地見講堂兩廡尙堪爲諸生  
藏修地惟大門爲文昌宮所壓不雅觀因思書院  
爲人才彙聚之區亦文明向陽之象宜改觀以宏  
體制遂與齋長等議及此事齋長曰欲易向須改  
作坐北向南不需另構材木特下磚瓦將講堂兩  
廡改易其向修大門以壯其觀工不甚費而事可  
成矣因將本年膏火用費以外所積若干金修而  
成之計自興工以及告竣但用銀一百一十餘兩  
不募化而集事事半功倍越次年復將所贖金置

買大悲寺地前後二段計丈一畝三分共費銀四十有奇誠盛舉也嘗考歷年書院或捐項買田或將寺院餘項買田載在舊碑章章可考爲延師脩脯及膏火用度等項俱有餘貲惟董事未得其人半爲侵漏今齋長能用所當用樽節愛養遂有餘積以新斯院履斯地者大門體制宏敞講堂兩廡亦移形換步煥然一新前不受壓後復寬容梧桐高百尺而鳳凰來集潮海渺無際而蛟龍起舞物旣如此人亦宜然從此遊斯地者藏修游息入爲

新都縣志

卷十四

藝文

四

醇儒出爲良佐皆足鳴

國家之盛以成文獻之邦也豈不美哉經修書院齋長李萬齲余維信陳維賢趙之琛楊殿颺陳今我王運新廖含章八人例得附書時嘉慶二十年歲次乙亥黃鐘月

况子哲先生總理錦水河天緣橋紀畧碑

子哲先生名大智姓况氏固學者之通儒亦吾鄉之奇士也生平以聖賢爲期許本學問爲經濟惜不得志於有司弗獲展其驥足騰驤王路以利濟

天下一時惜先生與深於先生者靡不爲之扼腕而先生晏如也頻年以來閱歷益深學養益邃幾於壯懷銷盡意氣自平矣然果毅沉雄之概時流露於韜晦之餘而端方正直之操早默契於風塵之表一若子羽掃迹公庭而賞識者自有長吏李愿幽棲盤谷而物色者且在上游所謂南山元豹不以霧隱掩其文大澤驪珠不以淵潛匿其彩理與勢有固然也乾隆戊寅吾鄉議修錦水河橋主之者故尹瑯琊王公也而難其總理之人咨於鄉

僉曰非子哲不能肩是任詢於學僉曰唯子哲乃能奏厥功決於龜蓍而繇詞告吉公曰唯唯子哲哉余心儀久矣何人謀鬼謀之悉合也爰舉是役授之先生先生慨然弗辭曰錦水無橋久爲吾新邑患余固新人也以新人除新患興新利固吾願亦吾分也敢不唯命庚辰石屏董公以名孝廉膺簡命來蒞新邑知人善任仍以橋事專屬之先生因得出其緒餘從容辦理凡三歷寒暑而大功卒底於成中間力排浮議未嘗不察納雅言也杜絕侵漁

未嘗不鼓舞善類也貲費幾及萬金而出納悉經一手徹底澄清終始如一任勞任怨不伐不矜既能體乎上意復大愜乎輿情衆方謀上其功於臺省請旌典爲先生壽而先生謙退弗違曰此吾邑兩侯之善政與吾鄉父老羣策羣力余得左右其間不敢隕越亦云幸矣他何有焉都人士重違先生意不敢以貢諛溷清懷謹叙其勞勩及謙抑之尊光勒諸貞珉不惟先生山高水長之風與斯橋並壽而生平以聖賢爲期許本學問爲經濟者亦

新都縣志

卷十四

藝文

六

可窺見一斑矣乾隆二十七年壬午仲春月閤邑公立

廳署古榴碑記

張奎

新都尉署楊升菴先生故第也舊有兩桂樹

國朝康熙中尙存王阮亭先生及見之不知何時樹爲人伐去乾隆中鈕君正湘來作尉植二株以補焉今輪囷矣花時香數里然觀者終以非升菴先生故物爲憾獨廳事前榴一株形質奇詭出土不及尺卽劈裂爲五其三攢立抗衡開柯高過屋其

二天矯橫出要紹曲赴如游龍如奔蛇附地親蘚  
孫枝百變軒然忽上揚翠舒綠敷爲車盖花大於  
盤十月中尙有開者視輪囷二桂一則瓦棺象鼎  
一則珠玉錦繡也余尉此後鈕君又數十年始入  
署日見榴而貽必其爲升菴先生物詢之故老而  
信竊喜奇跡之自我而彰也欄以衛之木以扶之  
於其側闢池如缺稍遠作茅茨數楹暇則會友以  
賞之滇南朱丹木孝廉曰子好古而弗亟爲表彰  
懼又如曩日之桂余竦然遂忘其不文立石以誌

新都縣志

卷十四

藝文

七

孝廉作贊並刊焉或曰茲榴得勿亦後人所植而  
子信之過乎不然何以阮亭先生言桂而不及榴  
也余曰古今奇蹟顯晦有時前人求之不得而後  
人得之者多矣岫嶁之碑岐陽之鼓亦後人所爲  
而不足信耶是爲記

古榴贊

朱 履

新都尉署古榴傳爲楊升菴先生植驍然闖然狀  
奇詭張君榆南勒碑以誌履請爲之贊其詞曰  
匪槐而龍匪松而壽臥者柳僵撐者梅瘦轆轤連

蜷騰挈駭闕植自前朝升菴之舊吁嗟先生始蜀  
終滇其身則謫其文則傳先生之作如榴斯華躡  
轢六朝朱明燦葩犧尊青黃榴乎幸免先生富貴  
文運之蹇天地長留孰與修撰昔在陽九貔豸牙  
蜀文獻劫灰禍逮草木榴蟠於茲不隨陵谷偉哉  
先生神明所弼暑雨枝柯祁寒根節久而彌堅如  
見忠烈大禮之疏廷杖之血桂湖可竭榴不可折  
我本滇人幼謁公祠來游於蜀廿載爲羈展先生  
墓讀先生詩見榴再拜先生我師

新都縣志

卷十四

藝文

八

彌牟鎮何孝童碑記

春

明

邑令

孝童姓何氏名國興小字水保邑之彌牟鎮人也  
性至孝閭鎮周知家貧無擔石之儲父廷楷負販  
爲業母鄧氏素患癱久臥床褥孝童日侍左右未  
嘗遠離一日父謂國興曰我在外乏人經理曷偕  
我去孝童泣曰大人命不敢違第吾母臥病已數  
年旣無伯叔終鮮兄弟兒去母將誰侍廷楷聞之  
惻然亦不强也遂去會壬午閏三月夜鎮遭回祿  
延燒七十餘家火烈風猛鎮民扶老攜幼紛紛他

竄號泣之聲不絕於耳孝童急入室負母力不勝復出外呼號求救市無人應者乃復入火已至不可復出遂抱母而死時年十三嗟乎人子之事親也惟孝爲難耳虞書致頌於克諧周易占吉於幹蠱復乎尙矣下之則有泣竹臥冰懷橘扇枕者未始不云孝也然求之於縉紳詩書之族則已難而況求之庸凡愚賤之中尤覺其難也乃何以髻釋之年猝遭變故計不能出母於危難之中甘以身殉其精誠摯誼實有大過乎前人者殆亦天性使

新都縣志

卷十四

藝文

九

之然歟亦惟我

國家以仁孝治天下凡在草野罔不沐浴

聖朝之雅化故臣與臣言忠子與子言孝吾知

深仁厚澤涵育薰陶之入人者深也不然一童子也何能若是哉茲閣鎮紳士等具呈請予嘉獎乃鳩工泐石述其顛末豈惟一邑之幸亦守土者光也故特表而旌之以勸來者

新建義學碑記

春 明

新都縣舊有龍門書院以爲陶育人材之地然所

造者成人而童子不與焉况清門赤戶無力從師  
幼而失教未免躍冶性成漸至流爲匪僻此小義  
學之設所宜亟亟也前任楊公宰是邑曾立義學  
四處捐給館穀惟新邑地小差繁官俸無多事難  
爲繼余承乏斯土思可以垂之久遠者有志未逮  
適奉調權判嘉州繼署此篆者爲福建黃公傑奉  
制憲檄飭興立義學爰集士民共籌義舉黃公倡  
捐銀一百兩義士陳于培蔡世樑各捐銀四百兩  
紳民相勸踴躍樂輸共得銀一千三百八十兩置

田收租以供脩脯之費設義學七處延師訓讀申  
詳立案永爲定制是舉也楊公實提倡於前黃公  
復振興於後而分財教善克成其美則陳于培蔡  
世樑二人之力居多其所以正蒙養培風俗有裨  
於治化者豈淺鮮哉余喜夙志之有成也因泐之  
石以垂不朽云耳

何孝童傳

張懷泗

孝子名水保十二齡耳新都彌牟鎮人鎮居民鱗次  
會火災水保母病久輦不起出門呼救而搶攘間

無暇應者水保復入母麾出水保呼號不肯去火  
熄鄰衆於餘燼中撿之則水保抱母床下焦灼死  
矣向聞王祥臥冰孟宗哭竹皆生事也君子猶以  
爲難介之推與母俱燼有托而逃君子又以爲過  
若水保之救母則苦於力之不勝而其心萬難捨  
母以去義惟有相抱以死事出倉卒餘非所計也  
所難者方十三齡而眞摯堅定如此足徵我  
國家仁孝之化所霑被者遠且深矣鎮人捐貲購地  
葬之

倉聖會序

倉聖會創自張公大琮於嘉慶二年八月初二日  
所辦魁神會捐化餘錢十千文復集同人捐貲輪  
流生息每年公舉誠實首事二人於三月二十八  
日恭逢聖誕之期脩設祭儀齊集慶祝歲以爲常  
歷年蒙神眷顧漸有餘積爰於嘉慶二十一年買  
得回村石姓水田一段旱地一段官弓計丈一十  
五畝零載糧二錢實去價銀及書畫用銀四百二  
十六兩整流金不敷取來壓租銀一百八十四兩

嗣後陸續退壓加租只取得壓租錢五十千文每年實收租穀一十九石道光十三年又買得附近石姓水田二塊鄉弓過丈三畝三分六釐二毫載糧六分八厘實去價銀一百四十二兩五錢五分佃取壓租銀四十兩每年實收租穀五石二斗於道光十五年同衆公議裝塑聖像神龕鑄造爐磬今工告竣祝典永垂爰將同人並樂捐善士姓名刊刻於石各照前規輪流經理簿據錢穀卽於會期公同清算交給安奉魁神牌位配享庶幾報本

新都縣志

卷十四

藝文

十二

有貲而二勝會永無廢墜之虞矣時道光十七年歲次丁酉

溫士高墓碑

李 惺

新都溫虞生從予遊言其曾祖有潛德請以文揭於其墓之原君諱文琇字士高國學生祖聖遠父世明世爲江西之長寧人君年十七隨祖若父自長寧入蜀遂於新都之彌牟鎮家焉君性純孝服勞奉養左右無方父病侍湯藥寢不歸室屢遣之不忍去矚之切始佯應暗伏牀側終不去如是者

五年父歿後哀毀骨立無笑容逢忌辰輒飲泣不能語昆季四人君爲家督友愛倍至教家崇儉樸而誠浮華樂施予親友待以濟者無數每受人欺有犯而不校風君之葬於斯者已五十餘年矣其合葬者則君之室人劉孺人也孺人與君稱素對敬戒自持而尤善事姑嫜能助君以孝聞子二光字光甲國學生例贈文林郎孫泰舒國學生例贈文林郎泰平曾孫德銓文生德尊德懿乙酉選拔中本科舉人德敷貢生德莊舜臣增生舜福廩生

新都縣志

卷十四

藝文

十三

舜敏元孫永惠文生其餘俱頭角崢嶸昂昂有器宇於戲孝爲至德通於神明觀於是而知君之得天者厚天之所以祚君者亦正未有艾也夫君生於康熙丙戌年卒於乾隆辛丑年劉孺人生於康熙壬辰年卒於乾隆癸卯年君之元配劉孺人先君二十五年而卒葬於太平橋之原另有表茲不贅云

溫縉欽墓誌銘

溫玉聲

公諱光甲字縉欽國學生例贈文林郎 祖世明

父文琇國學生妣劉孺人俱以積善聞生子二公其次也性孝友善體親心伯兄境困爲奠室家置基業必得親豫而後安其他優恤宗族者類如是也觀書悉通經史大義延師課兒孫不惜束脩薪水貲退塾趨庭親爲講貫若是者終始不倦居家儉約遇歲時享祀未嘗不豐潔好義舉數頃之田租石較常減十之二甚有給以耕具者親友宦遊每貸數百金而不索其償至稱貸以求生理者恒不屑權子母公之忠厚傳家以爲貽謀者遠矣其

孫德銓德懿以庚辰補弟子員公猶得親見焉乙酉德懿選拔中式而公已下世三年矣厥後德敷成貢生舜臣舜福曾孫永惠相繼入黌宮距公歿又十餘年使非生有盛德何能得後嗣顯揚以食報於無盡哉公於乾隆辛未生道光壬午卒年七十有二配黃孺人有賢行先公二十年而卒生子二長泰舒國學生次泰平孫八曾孫十九以癸未窆於臥龍岡廿餘年改葬於斯聲於公爲從子姪悉公生平梗概及葬與執紼焉爰爲之銘曰温温

恂恂涵和葆真能讀父書卓爾芳型其身不顯澤  
在文孫吾族之望其在斯人洵無慚於表號而爲  
縉紳之所欽

新都縣重修學宮記

張奉書

人不可一日而無教故天下不可一日而無學唐  
虞三代尙矣自漢迄明代有增置而我

朝奄有方夏尤以興學設教爲兢兢顧昔之立學者  
祀以其國之先聖先師其無者合他國以祀而今  
則通以孔子昔之祀先聖先師者釋菜釋奠於四

時而今則易以春秋之祭而著於令其爲制雖殊  
而教民以父子君臣長幼之節範民以格致誠正  
修齊之道使夫教成於上而俗美於下其所以爲  
制之意則未嘗不同也新都立學且千餘載明末  
毀於兵火我

朝屢經修葺而歷歲旣久日就隳剝奉書下車之始  
邑人士卽以重修爲請奉書爲之陳於大府書凡  
三上而後獲行蓋費財動以鉅萬非集衆率縉  
不足以庀材而舉事故其難其慎如此廟經始於

丁酉之春其位自孔子而下四配十哲兩廡諸賢之主無不具其屋自門序正位亭閣橋池庖湑庫廢之區無不飭其器自鐘鼓羽籥簠簋籩豆犧象尊壘之屬無不脩其用自士夫商賈之捐貲助材共計白金九千有奇其落成之日自春迄冬僅閱歲而已蓋邑雖介孔道而君子夙敦悃悞小人素勤本業故其民富完而安樂其樂事勸功而急於輸將匪獨習成亦勢使之然也昔文翁以文雅化蜀而王褒作聖主得賢臣頌一時彬雅之材蔚焉與

鄒魯同風新都距省舍餘意其化行自近人才必且輩出惜乎代遠年湮無由深考其姓字而明之楊文忠父子則邑人士飫聞而饜道者也奉書弁陋無狀誠不足希文翁而邑人士流風餘韻猶有存者顧獨無淵雅閎偉之材如楊文忠父子其人者乎誠使率其勸學之美進以修爲之功則士行茂而風俗移以稱我

朝所以興學設教之意洙泗之風猶未沫也如文忠父子者當必濟濟繼起又奚不足以媲文翁之

雅化乎哉孟子曰待文王而後興者凡民也若夫  
豪傑之士雖無文王猶興是在勉之而已廟基濶  
倍於前而規制由舊附廟之節孝名宦鄉賢祠皆  
遵制而新之其孝弟忠義祠則昔無而新置者廟  
成爰爲紀其大畧以待後之考古者且以爲邑之  
人士勸也至於木石之費工作之固與夫董事紳  
耆之姓名則別自有記茲不贅書

重修桂湖記

張奉書

縣廡之南有桂湖廣四十餘畝波光澄澈爲有明

新都縣志

卷十四

藝文

十七

楊升菴先生遺跡先生沿湖植桂樹製桂湖曲乾  
隆己巳湖水偶涸廢爲田楊君芹洲來宰是邑復  
濬爲湖湖中築土爲基者三殆有志營造而未逮  
也道光壬辰前令汪君霽嵐集士大夫捐金就基  
址結舫居方亭岸南建觀音堂湖東建樓供倉頡  
朱衣諸像水閣依其旁余蒞任後履其地以是湖  
旣爲先生遺跡卽應奉先生於其間而樓閣亭宇  
亦思有所增損以工鉅而止戊戌夏會他邑偶旱  
米價因之倍蓰鴻噉時有聲爰出俸錢導樂善者

輸金糴米賤其價以糴之至秋乃止餘鋤幾萬遂置沃畝百一十餘畝增龍門書院膏火廣養濟院煢獨之額尙有贏者三之一邑之諸君子咸以重修桂湖來請余欣然從之己亥春鳩工庀材購湖東隙地畝餘以益之斥其樓閣以爲前後廳刻木肖先生像奉於前其右爲水閣左則跨湖爲屋望之若舟壘石爲山障其前湖中築臺爲月夕吟眺處顧諸神像無位置所乃於門內建觀音閣長廊環其左右迤東建殿宇奉諸神像循其舊也觀音

堂舊址葺爲軒其地剝者修治之闇者塗澤之增置机按坐具之屬一百八事造小舟三門前隙地修市廛八椽取賃資爲歲修之用凡十閱月工始竣用銀以數千計不足者邑之人助之始終董其役者粟君純剛鞠君映台魏君作霖廖君昺高君星彩其楊君光俊向君開基魏君用中鄭君達書劉君安峒時亦經營之其規畫布置助余不及者則余友桐城姚仙槎騫之功爲最例皆得書是役也非圖美臺榭資游覽盖以先生文章節義爲一

代之冠此邦人士汎斯湖者當思希踪前哲觀感之心其有不油然而生耶他若烟波風月之佳先生曲中咏之矣故畧之

新都縣考棚記

張奉書

奉書治邑之明年大工以次而舉顧試士未得其所乃集邑之諸君子謀之僉曰此吾儕之願也爰度文昌祠內之隙地而經營之斥其劇場以爲重門空其旁屋以爲號舍閑閱之卑者高之垣墻之薄者培之祠之後半以奉神其前半以試士舉事

新都縣志

卷十四

藝文

十九

於夏訖工於冬凡八閱月而潰於成用緡錢以數千計用工匠以萬計用竹木瓦石以億計士免於露坐而漂搖之患可無虞地遠於囂塵而傳遞之弊由之絕盖一舉而兩善備焉是役也邑之諸君子實贊成之而自始至終不憚勞勩以身董其役者則高君星彩袁君煒周君書陳君志剛廖君懷彬廖君玉輝劉君煥曾君昭俊八人也例皆得書時道光十九年九月二十六日

重修龍門書院記

張奉書

新都小邑也而邑之人多好義凡有裨一邑之事  
倡之靡弗舉由來久矣考志乘龍門書院創自乾  
隆十八年邑令王君垂綺率邑人捐修於縣城之  
東五十四年任君琦以其地近市移建於此避囂  
也地雖稍偏亦甚隘房舍僅數椽士之好義者以  
限於地往往徘徊不得入諸生膏火又以經費短  
絀額數甚少余蒞任後亟欲擴充之以建考棚修  
聖廟暨桂湖養濟院白螺泉清白天緣諸橋相繼興  
作未遑也道光戊戌米價偶貴邑之好義者捐糶

以平之事竣有所餘因購田五十四畝歸書院厚  
其膏火增其獎貲以勵其志而土木之費無所出  
邑中向有公局以民力濟公亦義舉也余循其舊  
每事樽節之歷年多贏而少絀癸卯夏核計贏數  
度足工用因謀於衆曰書院爲造土地規模卑狹  
不足庇寒峻盍以所贏增其所少乎衆曰諾爰令  
汪生作霖魏生源普董其役鳩工庀材陳生有挺  
又捐其毗連隙地前後共二畝有奇以廣之高其  
閤閱植以材木以壯觀覽於其後增修堂廡縱橫

十一間閱三月而工竣自茲以往執經問難之士  
絃誦游息足以展布無俟皇皇焉趨超於門墻外  
也嗟乎余以丙申之秋來宰茲邑荏苒將八年愧  
碌碌無所建樹以裨邑之人而培人文恤滄獨重  
農利涉諸鉅工余獲以次而舉皆好義者有以成  
之余何功焉書曰作善降之百祥比歲百穀豐穫  
人民壽康豈無感召而然耶况彬彬多士由此爭  
自濯磨德日進而學日宏濟時達道致閭里榮爲  
邦家光尤好義之報所必然者諸生勉之時道光

新都縣志

卷十四

藝文

二十一

二十三年歲次癸卯仲冬月

重刻升菴外集跋

張奉書

升菴先生以議大禮謫戍滇南中間以石齋先生  
喪給假還里餘俱在戍所寓居感通寺坐臥小樓  
中窮愁著書四百餘種間與張禹山楊宏山唐廷  
俊梁佐諸人唱和提倡風雅使滇南獐狃之習化  
爲鄒魯洙泗之風迄今滇人崇祀之尊爲先師三  
百年來先生著作半就凋零蜀中所見者只陳大  
科所輯升菴全集八十一卷及全蜀藝文志李雨

村涵海中所刻升菴經說詩話詞話等四十餘種而已新都爲先生故里予抵任後凡先生祠宇舊宅墳墓及桂湖諸故蹟無不培植修補獨遺文除所見諸書外竟不能多覲癸卯秋先生之裔孫楊式如名光海由蓬州學署因公赴省便道過我見示升菴遺集三十六卷升菴外集一百卷二書遺集係萬曆時山左王大司馬象乾巡撫四川搜尋先生遺集先生之孫尙寶卿金吾與其弟宗吾編集遺文在陳刻八十一卷外另錄三十六卷以應

王司馬之求而布政使湯公日昭所刊刻者外集則先生沒後焦太史弱侯將先生所撰雜著刪其重複分門別類依次排纂付先生之姪名有仁刊刻行世余覽之汪洋浩瀚多人間所未見書始驚先生學之博才之大以萬死一生之身縋縲就道憑腹笥所記憶編輯成書以示後學其天分之高記醜而博實有大過人者而其時守兔園冊者繩愆糾繆尙有正楊諸書亦可謂蟬蛸撼大樹者矣二書皆明舊板遺集三十六卷式如自行刊刻今

年春諸紳士請修邑乘爰設局於文昌宮編纂先將外集付局中仿明舊本重刊先生一生忠孝大節其精誠所貫注發爲文章固有歷千古而不朽而式如抱殘守缺使三百年先代遺文微而復顯亦足徵先生之貽謀遠矣刻旣竣爰書其緣起時道光甲辰仲秋朔日

節孝魏母李孺人傳

黃琮

魏生用之余前試新都亟賞其文今歲以拔貢生入都來謁述其太母守節事因以傳請其言曰太

孺人氏李父開雲蜀之郫縣人太孺人其季女也生有至性事父母能得其歡心偶值疾疢衣不解帶者匝月時用之先大父自閩來蜀居新都開雲公一見契爲長者遂締姻焉先大父好傾財竭已拯救危急家漸落孺人歸悉其如此無幾微怨色見先大父拯濟戚黨且時鬻奩具佐之不給則終日愁歎謂不得相夫子成其令名也先大父以積勞成弱疾輾轉床褥者且四年孺人嘗夜焚香告天請以身代及病劇泣不食者四五日矢以死殉

先大父覺之握手言曰我死若必無死若死此呱  
呱者方三歲其何以自存是斬吾祀也孺人則泣  
應曰諾既先大父卒哭之慟絕而復蘇不得已乃  
強起視喪葬事當是時孺人年甫二十有四家餘  
薄田數畝宅一區朞功之親又遠在閩海族之人  
有覬覦其產者謂婦人不足與大事謬欲爲經紀  
其喪孺人拒弗應會書粟主孺人自署其名與氏  
配於上族人弗與曰吾魏家婦也與此主共死生  
矣有阻我者吾以死決之既葬復囑鄰媪再四諷

之嫁孺人皆峻拒不納以是謀稍寢然自經大故  
家益落厨無宿舂勤紡績以供饘粥每夜分猶未  
休也生父稍長命負笈就傅夜則篝燈課之讀偶  
倦輒述先大父遺事以感惕之聲淚俱下或出交  
一友必詢以行誼若何家小裕卽出其餘以周親  
戚之貧者嘗語生父曰汝父有言吾平日每積二  
錢一以自給一以給人汝第有餘資慎無忘乃父  
志故生父瞻族恤鄰始終不敢稍倦孺人之教也  
方新都修文廟及龍亭皆生父董其役每夜歸孺

人必以木石瑣屑事詢之孫曾輩勸以高年宜節勞則曰此吾所以報乃祖也孤子作事一不當負乃祖矣道光五年邑之人士以孺人苦節上之大府奏入得旨旌獎孺人矍然起曰吾生平茹荼餐蓼爲夫子宗祊計耳乃蒙

聖恩優渥如此吾一婦人豈敢言報願汝曹之激昂自勵也疾革時呼家人而告曰當吾親族相凌之日垂死者數矣常恐負先夫言不能見孤子成立今

新都縣志

卷十四

藝文

二十五

遺孤年已七十孫曾滿堂吾亦可以報夫子地下以今年二月十二日卒距生於乾隆十四年二月十八日享年九十子德增娶鄭氏女一適林孫三人長用欽次用之拔貢庚子舉人次用中庚子副榜曾孫三鴻通鴻遇鴻選 論曰昔余視學蜀中每屬邑之人士有苦節而未獲請 旌者以事實上輒給匾獎之其守節撫孤者概不乏人然如孺人之所處不綦難乎當其親族見逼非心堅金石安能處此而不變至於相夫教子一軌於仁雖樂

羊子妻韋逞母無以過也詩曰之死靡他易曰无成代終孺人有焉於戲可以風矣

皇清旌表節孝例封孺人魏母李太孺人墓表

王 篤

門人魏用之以廷試來京師奉其祖母李太孺人行狀謁予曰先祖母守節六十餘年蒙

皇上給銀建坊今兵部尙書卓公爲之誄侍講黃公惠之傳惟墓門之碣聲於後人者闕焉未備日月有時將葬敢以請按狀孺人李氏蜀郫邑李公諱開

新都縣志

卷十四

藝文

二十六

雲之季女年十七來歸協章魏公越六年公病故當病垂危孺人矢以身殉痛不食者四五日公指孤子德增曰若死此三歲何屬乃強食視孤子當是時協章公遺薄田數畝宅一區伯叔兄弟遠隔閩海無菘功之親支門戶族之覬覦其產者欲經紀其喪孺人不之許復以公積債脅之嫁孺人弗應會成主孺人自書其名氏配於公族人期其必嫁弗與孺人曰吾魏家婦也與此主共死生矣有逼我者吾以死決之事始中止夫世之稱女子者

曰節曰烈然烈婦易節婦難節婦而至丁單子幼  
內外之難蠡起祖嗣絕續關反覆手此其事不下  
丈夫百里之命六尺之孤之託於此而克完大節  
嗚呼可以感矣孺人性勤儉治家有法則尤仁慈  
好施與族人自閩來者爲之安家室營婚嫁無懈  
心無吝色教子孫以義方德增交一友必惓惓詢  
問其爲人有小過嘗呵責之改而後已享年九十  
猶勤勤教諸孫以敦行不怠此皆孺人過人之行  
然莫難於撫孤立節予故於用之之請次第其事

新都縣志

卷十四

藝文

二十七

表諸墓門以告魏氏子孫且以風世之二三其德者

詩

大度亭民謠

出益部耆舊傳  
王恠事見漢書

信哉少林世爲遇飛被走馬與鬼語

河內謠

王渙爲河內令商賈露  
宿人開門臥民歌之曰

王稚子代未有平徭役百姓喜

雁門太守行□

漢古辭

孝和帝在時洛陽令王君本自益州廣漢蜀人少行宦  
學通五經論明知法令歷代衣冠從溫補洛陽令化行

致賢外行猛政內懷慈仁移惡子姓名五篇著里端無  
妄發賦念在理寃清身苦體宿夜勞勤化有能名遠近  
所聞天年不遂早就奄昏爲君作祠安陽亭西欲令後  
代莫不稱傳

豔情代郭氏盧照鄰

唐 駱賓王

迢迢芊路望芝田渺渺函關限蜀川歸雲已落涪江外  
還雁應過洛水纏洛水傍連帝城側帝宅層甍垂鳳翼  
銅駝路上柳千條金谷園中花幾色柳葉園花處處新  
洛陽桃李應芳春妾向雙流窺石鏡君住三川守玉人

新都縣志

卷十四

藝文

二十八

此時離別那堪道此日空牀對芳沼芳沼徒遊比目魚  
幽徑還生拔心草流風迴雪儻便娟驥子魚文實可憐  
擲果河陽君有分貰酒成都妾亦然莫言貧賤無人重  
莫言富貴應須種綠珠猶得石崇憐飛燕曾經漢皇寵  
良人何處醉縱橫直如循默守空名倒提新縑成慊慊  
翻將故劍作平平離前吉夢蘭成兆別後嘒痕竹上生  
別日分明相約束已助宜家成誠勗當時疑弄掌上珠  
豈謂先摧庭際玉悲鳴五里無人問腸斷三聲誰爲續  
思君欲上望夫臺端居嬾聽將雛曲沉沉落葉向山低

檐前歸燕竝頭栖抱鄰當窗看夕兔側耳空房聽曉雞  
舞蝶臨階祇自舞嘯鳥逢人亦助嘯獨坐傷孤枕春來  
悲更甚峩眉山上月如眉濯錦江中霞似錦錦字迴文  
欲贈君劍壁層峰自糾紛平江渺渺分青浦長路悠悠  
間白雲也知京洛多佳麗也知山軸遙虧蔽無那短封  
卽疎索不在長門守期契傳聞織女對牽牛相望重河  
隔淺流誰分迢迢經兩歲誰能脈脈待三秋情知唾井  
終無理情知覆水也難收不復下山能借問更向盧家  
字莫愁

新都縣志

卷十四

藝文

二十九

新都南亭送郭元振盧崇道

張說

竹徑女蘿蹊蓮洲文石隄靜深人俗斷尋玩往還迷碧  
潭秀初月素林驚夕棲褰幌納蟾影理琴聽猿啼佳辰  
改宿昔勝寄坐睽攜長懷賞心愛如玉復如珪

新都行

歐陽詹

縹緲空中絲蒙籠道傍樹翻茲葉間吹惹彼花上露悠  
揚絲意去苒蒨花枝住何計脫纏綿天長春日莫

次孫直言九日登龍門山

宋趙抃

皇祐二年秋九月九日龍門遇佳節新都大夫孫隱之

報政優游共民悅升山高會賓主俱滿頭黃菊泛茱萸  
遙開醉眼極千里身高氣爽胸懷舒眷言登臨風景異  
澄川秀野如披圖殊方眞賞到奇處未來空只誇江湖  
嗟我江原忝民長周遭百里平如掌簿書役役甚囚拘  
聞有岷峨無計上及聞治邑茲山奇腳力不到神魂馳  
誰知我亦好山者篋中時復觀君詩

新都驛平遠軒

劉望之

霜晴木落送歸鞍袖手微吟此慰顏  
賸欲憑欄招白鳥更煩翦樹出青山  
晚悲薄祿非三釜賴許清詩見一斑

新都縣志

卷十四

藝文

三十

軒有外氏周次元帥蜀時詩

看到遠平纔得恨我寧歸臥尺椽間

遊彌牟王氏園

文同

短笻疏籬入野扃竹煙松露滿襟清  
奔湍激險飛寒響弱蔓穿深挂晚英  
惜去更觀曾壁畫記來重注舊題名  
門前便是紅塵道誰肯同過洗俗纓

暑行憇新都驛

陸游

細細黃花落古槐江臯不雨轉輕雷  
長空鳥破蒼煙去落日人從綠野來  
散策急行尋水石脫巾高臥避氛埃  
羈遊未羨端居樂看月房湖又一回

早發新都驛

陸游

喔喔江村雞迢迢縣門漏河漢縱復橫繁星月如晝愛  
涼趣上馬未曉閱兩堠高林起宿鳥絕澗落驚狢寺樓  
插蒼煙沙泉瀉幽竇我行忽萬里坐歎關河溜官如廣  
文冷面作拾遺瘦今年盍歸哉勿落春雁後

彌牟鎮驛舍小酌

陸游

郵亭草草置盤盂買果煎蔬便有餘自許白雲終醉死  
不論黃紙有除書角巾墊雨蟬聲外細葛含風日落初  
行遍天涯身尙健却嫌陶令愛吾廬

新都縣志

卷十四

藝文

三十一

九月十日如漢州小獵於新都彌牟之間投宿民

家

陸游

適從邛州歸又作漢州去天低慘欲雪遊子悲歲莫十  
年辭京國匹馬厭道路野火炎高岡江雲暗空戍角弓  
寒始勁霜鶻饑更怒邂逅成小獵尺箠聊指呼北連武  
侯祠南竝稚子墓合圍蹙窮鹿設伏截狡兔壯哉帶箭  
雉耿介死不顧吾寧暴天物戰法因得寓黃昏過民家  
休馬燎裘袴割鮮盛燔炙毛血灑庭戶老姥亦復奇汛  
掃邀我駐丈夫倘未死千金酬此遇

自廣漢歸宿十八里草市店疑即以東也陸游

月黑叩店門燈青坐床簀飯粗雜沙土菜瘦等草棘泰  
然均一飽未覺異玉食我豈兒女哉口腹爲怨德古人  
恥懷祿不仕當力穡從今扶犁手終老謝翰墨

謁諸葛丞相祠彌牟陣原上陸游

漢中四百天所命老賊方持太阿柄區區梁益豈足支  
不忍安坐視異姓遺民亦知王室在閏位那干天統正  
公雖已歿有神靈猶假賊手誅鍾鄧前年我過沔陽祠  
再拜奠俎哀淚迸潔齋請作送迎詩精忠大義神其聽

新都縣志 卷十四 藝文 三十二

遊彌牟菩提院庭下凌霄藤附古楠其高數丈花

已零落滿地 陸游

絳英翠葉亦佳哉零落空庭瑪瑙杯遍雨新花天有意

定知閒客欲閒來佛經云天風吹萎花更雨新好者

獵罷夜飲示獨孤生 陸游

客途孤憤只君知不作兒曹怨別離報國雖思包馬革  
愛身未忍價羊皮呼鷹小獵新霜後彈劍長歌夜雨時  
感慨却愁傷壯志倒瓶濁酒洗餘悲

關輔何時一戰收蜀郊且復獵清秋洗空狡穴銀頭鶻

突過重城玉腕騶賊勢已衰眞大慶士心未振尙私憂  
一樽共講平戎策勿爲飛鳶念少游  
白袍如雪寶刀橫醉上銀鞍身更輕帖草角鷹掀兔窟  
憑風羽箭作鷗鳴關河可使成南北豪傑誰堪共死生  
欲疏萬言投魏闕燈前攬筆淚先傾

彌牟鎮孔明八陣圖

王剛中

我稽八陣圖規模載方冊竭來鎮西川夔門觀壘石賦  
詩數百字字字究來歷進涉漢州西彌牟鎮之北平原  
列堆阜灘石同一式細思作者意孔明有深策高岸或  
爲谷灘石存遺跡滄海變桑田平原猶可覓故今兩處  
存千載必一得再歌遂成篇當有智者識

楊少卿廷儀歸省石齋閣老以長卷見屬請記其事  
少卿余己未所舉士也

李東陽

五色文章使我驚十年京國受君情袁卿奉職先郎署  
蘇轍傳家有父兄城上花明新衣錦橋邊人指舊題名  
誰言蜀道如天遠萬里星槎自在行

寄楊留耕先生

李東陽

峩眉山頭雲氣濃錦官城上花枝紅地靈人傑應特出

往歲吾識留耕翁一從獻策明光殿三世科名眼中見  
鸚鵡洲前驄馬歸鳳凰池裏麒麟現一品封高七袞稀  
烏紗玉帶明緋衣祇疑天上神仙是若比人間富貴非  
誰信今人不如古片玉一枝安足數蘇氏奇峰僅有三  
竇家芳樹纔稱五太史文章秘閣勲少年狀元才出羣  
眼看是父復是子此語吾傳揚子雲白頭憂國心尤切  
剛道承平好時節已見西川洗甲兵更依北斗瞻京闕  
元霜彩筆泥金箋爲君興寄西南天願山不童花不老  
一歲一賦長生篇

新都縣志

卷十四

藝文

三十四

送楊太常正夫歸蜀省其尊翁少保留耕先生次

太宰邃菴楊公韻二首

費宏

咫尺天顏許暫違臣忠子孝本同歸  
瑞虹亭舊開華宴濯錦江清舞彩衣  
喜信遠憑雙鵲報鄉心先逐片雲歸  
門迎笑語眞堪畫老大全勝帶玉圍

此行人羨是登仙蜀道從來似上天  
漢代家聲推石奮王家世譽數僧虔  
夢依北極常千里詩補南陔第一篇  
所至蒼生煩問喘歸來宣室豈虛延

送楊太常歸省三首

何景明

扈聖元公在寧親季子歸鳳凰銜寵詔駟馬動光輝回  
馭心先切題橋志不違都人看祖帳共嘆此行稀  
錦里趨庭日聲華見蜀都弟兄今二妙父子宋三蘇禮  
樂風雲地旂常日月圖今皇念大祀未可滯江臚  
聞道西京寇猶多虎豹羣過秦應有論諭蜀可無文未  
返巴山使空懸棧道軍煩將父老意歸報聖明君

送韓大之赴新都

何景明

漢廷仙令幾時回蜀道風烟此日開萬里一琴將鶴去  
九霄雙鳥望鳧來雲邊石棧斜懸閣樹裏春流曲抱臺

新都縣志

卷十四

藝文

三十五

藏器久知盤錯意脫囊今見古人才

石齋歌

何景明

濯錦江中錦爲水白石粼粼映江底江頭齋閣石嵯峨  
卜築題名總因此崖撐壑挂盤天地產秀生神豈人意  
日月宵通灑瀨根風雲晝吐岷峨氣明公少年天下奇  
琅玕五色動光輝扶疎太華仙人掌照耀銀河織女機  
明堂大廈要梁棟不獨文章翰林重懸磬直諧韶濩音  
國琛果獻珪璋用公登雲閣望雲林霄漢長歌白石吟  
功成思袖補天手力在寧忘障海心衛公德業懷應滿

李相風流今不遠海內完名已玉成平生貞志同金斷  
萬里橋邊綠竹園百花潭畔平泉館待公一起慰蒼生  
還臥西山未應晚

送楊石齋

薛蕙

社稷功成後山林避寵年遭逢誰可並出處獨超然反  
側當前日經綸邁昔賢殷憂興聖主至治格皇天凶豎  
同摧朽蒼生盡解懸廟謨隨指顧臣節見周旋智勇千  
夫敵勲勞百辟先賞仍虛列土名已重凌烟握璽慚周  
勃揮金笑魯連急流嫌盛滿介石慕貞堅許國心恒切

新都縣志

卷十四

藝文

三十六

還鄉興偶牽留侯初相漢樂毅晚辭燕異渥絲綸數高  
風進退全草停黃閣詔花簇錦江船水檻星橋側茅堂  
雪嶺邊雲霞深綠野卉木富平泉事業存鐘鼎儀型照  
簡編累朝瞻翊戴四海憶陶甄白首歸休計青春送別  
筵衣冠望行色端不異登仙

新都辱楊瑞虹司馬前輩飲餞西莊

劉希尹

司馬曾爲南省彥江州猶有故人情干旄小憩誅茅地  
罇俎遮留濯錦城接岸茸茸新草細迴塘片片去鷗輕

比年落託眞無賴萬里來收吏隱名

送劉憲副函山子至諸葛祠有作 楊廷儀

爲送三齊客來遊八陣祠按圖尋舊壘改築見新基再  
拜瞻遺像中原憶出師幽思多許下千載幾垂洩  
漢中初建國西蜀亦稱秦四百垂炎紀三巴屬後塵艤  
舟迷變計啟土若通神漂泊依荆客揚休賴若人  
荒壘牛羊牧高名宇宙垂愛烏慙佛寺知已謝鍾期廟  
貌非前日衣冠異昔時我來趨几下一瓣寄深思

江漢通夔峽秦關接蜀都三分悲舊國兩地託新圖我

新都縣志

卷十四 藝文

三十七

自傷飛羽人誰羨魏吳頓令星殞處仲達愧非夫

前題次韻

楊 惇

憲使崇先哲功臣肅舊祠乾坤留白羽日月愴炎基豈  
獨三分相直爲百世師臥龍幾瞻拜立馬倍咨洩  
芒山赤帝子蹙項更誅秦宇宙千年業兵戈五載塵存  
亡原有數呵護豈無神自是炎光盡忠眞賴此人  
兩立誰扶漢偏安西北垂顧三心未已解六事無期殊  
遇追前日孤忠盡此時丹青先後表讀罷不勝思  
大雅函山子翛然興節都舊淹先聖典今按昔賢圖孔

化崇鄒魯朱文黜魏吳是非千載筆揮灑愧凡夫

前題次韻

楊恂

江水彌牟鎮秋風諸葛祠五原荒舊壘八陣覩遺基杖  
策眞王佐前籌亦帝師運移難並美俯首獨咨洩  
巫峽元通蜀岷山不限秦輿圖憐板蕩宇宙逐風塵二  
表心如日三分語入神誰知離亂際經濟有斯人  
淵深龍臥穩雲冷鳳飛垂用武嗟無地興王信有期名  
成三顧後威著七擒時悵望英雄遠空餘不盡思  
傅巖方卜夢雷澤忽成都霄漢看紆策風雲羨遠圖已

新都縣志

卷十四

藝文

三十八

知卑管樂何事論孫吳千載吟梁甫慙予亦壯夫

前題次韻

楊慥

大賢餘故跡壯觀說新祠功業留方冊河山自丕基隆  
中分漢鼎劔外振王師千載吞吳憾令人幾泪洩  
表忠辭後主振旅向三秦此地閒揮羽中原未息塵曹  
吳空闕武諸葛乃傳神何事秋風起皇天忌偉人  
荒原秋草合松栢尙垂垂恢復雖多術興王自有期謀  
謨猶昨日感慨欲同時遺像風霜古瞻依罄所思  
借郡屯襄漢踰年定蜀都風雲隨健翮日月照雄圖致

力方趨魏潛交日聘吳出師酬顧命不是戀征夫

過新都彌牟鎮閱武侯八陣圖 劉侃

彌牟鎮前秋色碧臥龍祠下秋蟲泣我來息馬一登臨  
荒碑重拭龍蛇跡西風吹草綠烟開萬里蕭蕭滿目來  
縱橫欲吐風雷氣錯落還如星斗回圖中雲鳥人不識  
圖上遺塵人共惜蜀國山河幾變更中原鹿走無時息  
古來戰壁滿乾坤落葉隨風不復存何似彌牟一坏土  
勢抗玉壘爭崑崙

回自新都追易學憲不及有作 鄔紳

新都縣志

卷十四

藝文

三十九

南轅返旆歷郊坰華轂朱輪錦里行岷嶺晴嵐浮曉甸  
導江流水繞春城風迴鼉鼓花間動日射龍旂柳外明  
何事文星獨不見令人回首望蓬瀛

秋日客居呈楊少師先生 鄔紳

碧空雲淨倍秋光山色江聲引興長林杪忽驚霜有信  
天涯猶阻雁成行娟娟小竹穿花徑裊裊寒藤蔓草塘  
正憶清明黃閣老丹心白首奉君王

兩宿楊僉憲故宅 丁自紳

新都閔閱關西盛甲第連雲亦壯哉黃閣昔存扶赤日

朱門今見鎖蒼苔  
吏傳清白人何在  
客覽悲歌馬復來  
忽憶華亭傷鶴唳  
夜深聞笛更堪哀

毘橋兩渡

盧雍

橋斷毘江路  
殘霞水底天涯邊  
還有渡莫怪急呼船

桂湖夜月

盧雍

月白湖光淨  
波寒桂影繁  
人間與天上  
兩樹本同根

桂湖曲送胡孝思

楊慎

君來桂湖上  
湖水生清風  
清風如君懷  
灑然秋期同  
君去桂湖上  
湖水映明月  
明月如君懷  
君悵然何時輟  
湖風

新都縣志

卷十四

藝文

四十

向客清湖月  
照人明別離  
俱有憶風月  
重含情  
含情重  
含情攀留桂  
枝樹珍重  
一枝才留連  
千里句  
明年桂花  
開君在  
雨花臺  
隴禽傳語去  
江鯉寄書來

戊寅九日龍門登高

楊慎

江山盤踞千年地  
風雨崔嵬百尺臺  
搖落霜林秋籟發  
參差雲堞曉光開  
四愁多阻張衡望  
九辨堪興宋玉哀  
望遠登高聊自遣  
芳萸艷菊漫相催

唐僖宗行宮遺礎次熊尙弼侍御韻

名相

楊慎

唐帝行宮有露臺  
礎蓮幾度換春苔  
軍容再向蠶叢狩

王氣遙從駱谷來，萬里山川神駿老。五更風雨杜鵑哀，始知蜀道蒙塵駕不及。胡僧渡海盃礎今在僧寺

赤岸山送別效謝靈運

楊 愼

茲山亘長江，合沓氣象分。朱壤凝炎德，光輝灼頰雯。陽景有先曉，陰霞遲餘曛。朝暮多奇態，草木含靈氲。既下鸞鶴侶，亦來麋鹿羣。石床閱古蘚，丹竈流烟瀆。遊屐久蕪沒，仙跡空塵分。曰予敦元尚，偕子挹清芬。東嶠拾瑤草，西岳采香芸。行汎青木水，坐睇峩眉雲。躑躅守甃徑，警效何當聞。

新都縣志

卷十四

藝文

四十一

八月二十三日與馮東沙任蒼崕往郫原觀王稚

子石闕二十二韻

以下見升菴遺集

楊 愼

東漢有循吏，稚子與爲多。旣入東觀記，復播樂府歌。墓道鄴原上，石闕巍嵯峨。左右三十字，照耀錦苔窠。八分隼尾隸，千載耿不磨。闕端巧刻畫，隱璘交森羅。右闕向西陸，左闕望東陀。右騎馳華駟，左挽以索駝。巢棲絕鳥雀，櫓生無藤蘿。前溪劉巨濟，評讚無缺訛。蘇臺盧師邵，垂聽下湔沱。嗜奇搜臯廩，弔古尋軸邁。旣樹柏松植，仍禁樵採過。斯人已宿草，遺鑄此邱阿。重來已湮泐，荒榛

雜柔莎下馬奠卮酒重此賢匪他傍觀耄及倪駭視訝  
且呵二子馮與任好古無殊科手摹且腹劃繫維久蹉  
跎昌黎比金薤龍**眠**藏雕戈糾繆勘史傳豈徒工磔波  
作詩繼獵碣辯口思懸河

四月甲子立夏自毘橋泛舟夕宿寂光寺

月改朱明律天青甲子雲名山紆勝引流水惜離羣蘋  
末鮮飈起藤陰顥氣分上方雞犬靜鐘梵夜深聞

瑞虹叔父壽詩

小春正與東風近元氣平臨北斗斟履跡衣香分壽筭

新都縣志

卷十四

藝文

四十二

臺鸞池鳳集華簪韋家舊事專花樹阮氏清遊在竹林  
縮地難招仙叟隱懷鄉徒效越人吟

晉寧觀社將歸留別諸君子

東臺北道苦相留花月春城夜色悠錦傘夫人雙轂轉  
金輪太子四門遊九枝燈下開華宴百戲棚中奪彩籌  
南北相過殊未遠綠波紅嶼更輕舟

夫人晉太守李  
毅女有功於世

寄外滇南

黃氏升菴  
繼室

雁書曾不到衡陽錦字何由寄永昌三春花柳妾薄命  
六詔風烟君斷腸曰歸曰歸愁歲暮其雨其雨怨朝陽

相聞空有刀環約何日金雞下夜郎

庭榴

移來西域種多奇檻外緋花掩映時不爲秋深能結實  
肯於夏半爛生枝翻嫌桃李開何早獨秉靈根故放遲  
朶朶如霞明照眼晚涼相對更相宜

春日卽事

含鍼戳破窻兒紙引入梅花一線香  
螻蛄也知春色好倒拖花瓣上東墻

絕句

新都縣志

卷十四

藝文

四十三

纔經賞月時又度菊花期歲月東流水人生遠別離

寄升菴調寄黃鶯兒

積雨釀春寒見繁花樹樹殘泥塗滿眼登臨倦江流幾  
灣雲山幾盤天涯極目空腸斷寄書難無情征雁飛不  
到滇南

寄升菴

懶把音書寄日邊別離經歲又經年郎君自是無歸計  
何處青山不杜鵑

送楊升菴客還滇南

余承業

子雲辭天祿南走哀牢鄉稽首謝閭闔銜恩不敢忘策  
馬達天津張帆度飛梁孤劍伴衾枕洞庭與瀟湘鵬賦  
揮賈涕鳳歌激楚狂幽蘭被九畹采采不盈筐五月冒  
瘴氣異哉驅逐強問俗邁牂牁至止滇之陽卉木麗繁  
輝山海搖晴光復有好奇士摳衣來門牆濯泉選碧玉  
嚙雪搜點蒼城飛花霧煖寺入松風涼飯兒資海貝宴  
客傳檳榔可惜昆明旅可憐詞林望蹉跎成白首艱苦  
斷柔腸金鷄豈不赦奈何數乃妨暫以奉戎役趨過桑  
梓旁青冢咽烏號荆樹悲鴻翔萬物遂拖化窮旻胡茫

新都縣志

卷十四

藝文

四十四

茫夙夜懷往義秉燭理行裝邂逅青衣浦勸進紫霞觴  
歷歷歲月馳悠悠道路長袂連意俱愜鬢改情各傷抱  
憂予局促戒遠君傍徨傍徨聽我歌浮生焉用忙潮州  
非魍魎白也流夜郎折木感姪旦撫髀思馮唐神劍有  
時合良璧豈終藏騏驥食弗飽荃蕙性本芳詹尹不能  
卜顏壽彭乃殤天運詎如此窮達未可量努力崇令德  
萬驥仰文章養雛學鳳鳴挾飛覽遐荒金馬舊梧竹翩  
翩雲錦裳歌罷轉遲暮棹月下平羌江鳥舌初巧江柳  
眉已黃離別在須臾後會擬何方夢中見顏色尺素遙

爲將

投荒詞寄升菴

雲南永昌人 張含 禺山

批鱗兮叫閹投荒兮命屯滇海深兮茫茫蜀山高兮蒼  
蒼涕淚潺兮異域魂夢返兮故鄉王孫欲歸兮路迷落  
木蕭蕭兮商風淒淒碧鷄山杳兮猿夜啼金馬關遙兮  
雲晝飛天衢何亨兮棄君則那鳳池藉藉兮夔龍多

寄楊升菴太史

張含

文章聲價輝東觀威鳳盤鴻霄漢間垂釣歎尋青雀舫  
趨朝滂憶紫宸班身棲滇海非爲客夢落巴山不當還

新都縣志

卷十四

藝文

四十五

江閣停雲一灑淚傷心遙望碧鷄關

黃菊風微過草亭白醪香滿勝湘醺丁年去國憐蘇武  
投老還鄉羨管寧金馬樹寒清鶴夢蠶叢雲起見龍形  
虹橋北望傷心地江上雙峰晚更青

東觀聲名北斗齊鳳凰踪跡戍雕題八千里外潮陽馬  
十九年來海上祗銅柱蒹葭鴻雁響鐵城煙雨鷓鴣啼  
連霄數有懷人夢記得分明錦水西

天涯踪跡歎殊方離夢中宵極渺茫子厚音書連百越  
屈原詞藻遍三湘青山落日江湖白赤塞愁煙樹木黃

花隱禪宮孤夜月遲君同臥贊公房  
錦城逐客棲滇國綠樹青霞遶戍樓字學名家推郭璞  
剡溪高興屬王猷極天關塞歸心迥深夜江湖遠夢浮  
二十四年金馬路海風山月不勝秋

寄升菴

公子思歸幾歲華王孫芳草遍天涯樓頭艷曲包明月  
海口新銘蔡少霞光祿塞遙空遞雁上林枝好只棲鴉  
夢中記得相尋處東寺鐘殘北斗斜

人日草堂詩引

江南寶  
應人 朱曰藩子价

新都縣志

卷十四

藝文

四十六

升菴先生在江陽以畫像寄我白下揭於寓齋日夕  
虔奉如在函丈嘉靖己未人日西城金子大輿東海  
何子良俊吳門文子伯仁黃子姬水郭子策秣陵盛  
子時泰顧子應祥相約過余觴之齋中齋南嚮先生  
像在壁間諸君不肯背之坐各東西席如侍側之禮  
比邱圓瀾罌中冷泉見餉覓得陽羨貢茶一角烹泉  
爲供以宣甌注之焚沉水香於鑪作禮畢就坐各嘖  
嘖歎曰幸甚今日乃得覩升菴先生文子曰今日之  
會奇矣予當作人日草堂圖以寄先生子欣然拊掌

因歌人日題詩寄草堂遙憐故人歸故鄉之句作八  
闔散諸君請各賦一篇并寄先生見吾輩萬里馳仰  
之懷越二日文子圖告成又二日諸君詩次第成予  
乃爲之引

分得遙字

江南長洲人 黃姬水 淳父

一勺名泉手自調石筵香燼夜遙遙半生寤寐虛雙鯉  
萬里容輝挹片綃學海兢誇天閣秘春心欲托帝巫招  
芳樽潦倒郎官舍江芷臯蘭雨未消

分得鄉字

江南長洲人 郭第 次甫

新都縣志

卷十四

藝文

四十七

先朝金馬重文章三十餘年適瘴鄉共羨史遷紬石室  
誰憐賈傅老瀟湘披圖月就金陵墮飛夢雲牽玉壘長  
方外遊踪元不繫欲將瓢笠問江陽

分得題字

江南長洲人 盛時泰 仲交

人日寒多雨意低冶城春色柳條齊梅開東閣斜穿檻  
潮過西州亂入谿天末丰神勞夢寐壁間邱壑有詩題  
碧雲回首人千里巴水東流猿夜啼

分得憐字

西城人 金大輿 子坤

人日梅花自可憐折來誰爲寄西川八行欲附銅魚使

四海爭謠白雪篇  
滇水山川增氣色  
錦江花柳隔風烟  
何時一棹穿巴峽  
得就揚雄問太元

分得歸字

江南寶  
應人 朱日藩 子价

桐花落盡鷓鴣飛  
吉甫臺邊春事稀  
錦水繁華添麗藻  
禺山金碧有光輝  
爨中僮隸傳書至  
煎上人家沽酒歸  
笑挈一壺江浦去  
輕紅剛值荔枝肥

按己未歲升菴先生年已七十二卽以是年六月卒於永昌則當詩畫郵致之時先生已不得見矣是舉也論交之眞敬長之慤樂善之誠胥於此徵

新都縣志

卷十四

藝文

四十八

焉先輩風流眞可以寬鄙惇薄名不虛立士不虛附用修何得此於諸賢哉亦可以感矣傳之後世不獨爲藝苑之美譚也

見靜志  
居詩話

新都懷楊用修太史

江西南  
昌人 熊文舉 雪堂

行行且止緩鳴鞭  
指點村墟出暮煙  
共惜夜郎供奉老  
重搜西蜀子雲元  
一時藜閣無雙士  
千古瑯理有二天  
我亦窮經慙脈望  
馬頭驅策爲誰憐

月波池

方 芾 新都  
教諭

西郊池館訝天開  
勺勺清泉絕點埃  
春早魚龍爭變化

夜深星斗見昭回  
淵澄自昔通銀漢  
潮落於今長綠苔  
淑景莫嗟興廢事  
波靈容易去還來

挽升菴太史次韻

高世彥

內江人

萬里西南天盡頭  
英雄斷送此生休  
不聞午夜蘇公燭  
誰釋當年箕子囚  
生寄死歸應數定  
文衰天喪豈人謀  
多情亦有昆明水  
也解愁君咽不流